

खबरां

1. संसद दे दौनें सदनें च केंद्री बजट 2026-27 पर परतियै चर्चा शुरू होई।
2. प्रधानमंत्री मोदी 14 फरवरी थमां असम दे दौरे पर रौहडन।
3. दिल्ली हाईकोर्ट नै राश्ट्री राजधानी च गुमशुदा लोके कन्नै जुडी दी पी.आई.एल पर दिल्ली पुलिस गी नोटिस जारी कीता।
4. भगवान बुद्ध हुंदे पवित्र अवशेष अज्ज श्रीलंका दे कोलम्बो च इक हफ्ता भर चले दे लोके लेई प्रदर्शनी दे मगरा भारत लेई रवाना होए।
5. कनाडा दे टम्बलर रिज च स्कूल च गोलीबारी च 10 लोके दी मौत, दर्जनां जख्मी, प्रधानमंत्री नरेंद्र मोदी होरे इस दर्दनाक घटना पर बसोस जताया।
6. मर्दे दी आई.सी.सी टी-20 क्रिकेट विश्व कप च दक्खन अफ्रीका नै इक रोमांचक मुकाबले च दुए सुपर ओवर च अफगानिस्तान गी हराया।
7. ते हाँकी च भारत अजज संझा राउरकेला च एफ.आई.एफ प्रो. लीग कैपेन च बेल्जियम खलाफ मुकाबला खेडोग।

<><><><><><>

RS Union Budget

राज्यसभा नै केंद्री बजट 2026-27 पर चर्चा परतियै शुरू करी दित्ती ऐ। IJML दे हारिस बीरन होरे दोष लाया जे बजट च करसाने ते मल्लुआरे लेई किश नेई हा। उनें एहू बी आरोप लाया जे बजट च केरल गी नजरंदाज कीता गेआ ऐ। उनें केरल च रेअर अर्थ प्रोजेक्ट दे बारे च सफाई मंगी। भारती जनता पार्टी दे अशोक चौहान होरे आखेआ जे बजट युवाएं पर केंद्रित ऐ। महिलाएं, करसाने, उद्यमिये, गरीब-गुरबे, वंचिते ते समाज दे सब्बै वर्गे गी मजबूत करदा ऐ। उनें आखेआ जे एहू समूलचे मुल्ले लेई बजट ऐ। साबका प्रधानमंत्री ते J.D (S) लीडर एच.डी देवगोडा होरे आखेआ जे भारत च दुनिया दी अगुवाई करने दा हुनर ते जज्वा ऐ। उनें मेद बुज्जी जे एहू बजट ना सिर्फ नम्बरे लेई सगुआं अज्ज मजबूत अर्थवस्था बनाने ते कल गी होर मजबूत बनाने दी समझदारी लेई चेत्ता कीता जाह्ग। देवगोडा होरे आखेआ जे सिर्फ ग्रोथ काफी नेई ऐ, सगुआं रोजगार, योजना दी सोच दा केंद्र होनी लोडचदी। लोकसभा च केंद्रीय बजट 2026-27 पर चर्चा परतियै शुरू होई। निर्मला सीतारमण होरे इस म्हीने दी अखीर च पार्लियामेंट च केंद्री बजट पेश कीता।

<><><><><><>

Rijju-Rahul Gandhi

संसदीय मामले दे मंत्री किरिन रिज्जू होरे आखेआ ऐ कि लोकसभा बजट पर चर्चा दे दरान बेबुनियाद बयान देइयै सदन गी गुमराह करने दे आरोप च सरकार राहुल गांधी हुंदे खलाफ इक विशेषाधिकार नोटस भेजोग। संवाददाताएं कन्नै गल्लबात करदे होई उनें आखेआ कि राहुल गांधी होरे प्रधानमंत्री मोदी हुंदे पर बी झूठे ते बेबुनियाद आरोप लाए ना। उनें पुच्चेआ जे राहुल गांधी होरे गी दस्सना होग जे उनें किस सूचना दा जानकारी दी बुनियाद पर एहू आरोप लाए न ते अपने आरोपे गी ओहू साबत करियै दस्सना। किरिन रिज्जू होरे आखेआ कि राहुल गांधी हुंदे एहू हरकत विशेष अधिकार दी सरासर खलाफवर्जी ऐ ते सरकार अध्यक्ष होरे गी इस सरबंधे च जरूरी नोटिस भेजोग। उनें दोष लाया जे बरोधी धडें दे नेता नै बजट पर चर्चा च कोई कारी दा सहयोग या योगदान नेई दित्ता जेह्डी जे इक बडे गै मंदे भागे आहली गल्ल ऐ।

<><><><><><>

Industrial Relation Code bill

इंडस्ट्रियल रिलेशन कोड बिल 2026 अज्ज लोकसीा च पेश कीता गेआ। यूनियन लेबर ते रोजगार मुहैया करोआने सरबंधी मंत्री मनसुख मांडविया होरे जीरा हावर्स दरान हाउस च बिल पेश कीता।

<><><><><><>

PM Assam Visit

प्रधानमंत्री नरेंद्र मोदी 14 फरवरी गी कई प्रोजेक्टें दा उद्घाटन करने लेई असम जाने आह्ले ना। ओहू अपने असम दौरे दरान इक ऐतिहासिक पल बनाने आह्ले न कीजे ओहू बडुलै डिब्रूगढ जिले च डिब्रूगढ मोरन स्ट्रेच पर चबुआ च नार्थ इस्ट दे पैहले हाईवे आधारित इमरजेंस लैंडिंग स्ट्रिप थमां लैंड ते टेकआफ करंगन। अधिकारिक सूत्रें मताबक प्रधानमंत्री पैहले चबुआ एयर फोर्स बेस पुज्जडन ते फही मोरन जांगन जित्थे ओहू खासतौर पर बनाए गेदे हाइवे एयर स्ट्रिप पर लैंड करंगन। प्रोग्राम तैहत कई लडाकू ज्हाजें दे बी उतरने दी मेद ऐ बल्के किश फ्लाई पास्ट करंगन।

<><><><><><>

Delhi-HC

दिल्ली हाईकोर्ट नै अज्ज दिल्ली पुलस गी इक पी.आई.एल यानि पब्लिक इंटरस्ट लिटिगेशन पर नोटिस जारी कीता। एहू राश्ट्री राजधानी च लापता लोकें दे मामलें कन्नै सरबंधत ऐ। सुनवाई दरान दिल्ली हाई कोर्ट नै दिक्खेआ जे दिल्ली च लापता लोकें दे मामलें च मीडिया च अजें 2 बक्ख-बक्ख चाल्ली दिआं गल्लां चला'रदियां न ते आखेआ जे ओहू सरबंधत अधिकारिएं थमां जवाब थ्होने दे मगरा असल स्थिति दी जांच करोग। दिल्ली होई कोर्ट नै पी.आई.एल पर अगो दी सुनवाई 18 फरवरी गी तय कीती ऐ।

<><><><><><>

IAF Vayu Skahti

भारती वायु सेना राजस्थान दे पोखरण च आयोजित एक्सरसाइज वायु शक्ति दे रूपै च अपनी सटीक नशाना लाने दी क्षमताएं दा प्रदर्शन करोग। अज्ज नमीं दिल्ली च समारोह दरान मीडिया गी जानकारी दिंदे होई वाइस चीफ ऑफ द एयर स्टॉफ, एयर मार्शल नागेश कपूर होरें जानकारी दिती जे अभियान दरान 120 थमां मते डिफेंस एसेट्स तैनात कीते जाडन। इस म्हीने दी 27 तरीक गी होने आह्ले इस अभियान च वायु शक्ति च कुल 77 फाइटर एयरक्राफ्ट, 43 हेलीकाप्टर ते 8 ट्रांसपोर्ट एयरक्राफ्ट हिस्सा लैडन।

<><><><><><>

Buddha-Relics

भगवान बुद्ध हुं'दी पवित्र देवनीमोरी अवशेष अज्ज श्रीलंका दे कोलम्बो च पवित्र गंगारामया मंदरै च हफ्ता भर चली दी लोक प्रदर्शनी मगरा भारत लेई रवाना करी दिती गेइयां न। सांस्कृतिक मंत्रालय नै दस्सेआ जे श्रीलंका दे मंत्रिएं ते श्रीलंका च भारत दे हाई कमिशन हुं'दी मौजूदगी च बंदरानाइक अंतरराश्ट्री व्हाई अड्डे पर रस्मी तौरा विदाई होई। पवित्र अवशेषें गी जिनेंगी पैहली बारी अंतरराश्ट्री प्रदर्शनी लेई विदेश लेता गेआ हा, इक उच्च स्तरीय भारती प्रतिनिधिमंडल उनेंगी वापस आहना'रदा ऐ।

<><><><><><>

Pandit Deendyal Tributes

उपराश्ट्रपति सी.पी राधाकृष्णन, प्रधानमंत्री नरेंद्र मोदी, गृह मंत्री अमित शाह ते लोकसभा स्पीकर ओम बिरला होरें पंडित दीनदयाल उपाध्याय होरें गी इक दूरदर्शी विचारक ते राश्ट्र निर्माता दस्सेआ जिनें अपना जीवन समाज दी सेवा च समर्पित करी दिता। इक होर मीडिया पोस्ट च प्रधानपमंत्री होरें आखेआ जे पंडित दीनदयाल उपाध्याय हुं'दे सिद्धांत ते बचार जेडे मुल्लें कद्रे पर आधारित न, हर पीढी लेई मार्गदर्शक बने रौहडन।

<><><><><><>

Bangladesh Election

बंगलादेश च चुनां कमिशन नै कल होने आह्ले राश्ट्री संसदीय चुनां थमां पैहले अज्ज मुल्ख भरै दे मतदान केंद्रें पर बैलेट बक्सें ते होर दुआ चुनां सरबन्धी समेयान बंडना शुरू कीता। बैलेट बक्सें मतदान केंद्रें पर संझा तगर पुज्जने दी मेद दस्सी गेदी ऐ। 299 चुनां क्षेत्रें च 42 ज्हार 779 केंद्रें पर बडुलै 7 बजे थमां संझा साडे 4 बजे तगर मतदान बरोबबर जारी रौहगा। चुनां कमिशन नै आखेआ ऐ जे 12 करोड़ 77 लक्ख मतदाता जिंदे च 6 करोड़ 48 लक्ख मर्द ते 6 करोड़ 28 लक्ख महिलां शामिल न, वोट पाने योग्य न।

<><><><><><>

Netanyahu Trump Meet

इजरायली प्रधानमंत्री बेंजामिन नेतनयाहू होंरें अज्ज वाशिंगटन च अमरीका दे राष्ट्रपति डोनल्ड ट्रम्प हुंदे नै मिलडन ते अगले दौर दी गल्लबात च ईरान दे बैलिस्टिक मिसाइल प्रोग्राम पर सख्त रौंऽ अपनाते लेई उंदे पर दबाऽ बनाडन। व्हाईट हाउस दी प्रेस सैक्रेटरी कैरोलिन लेविट होंरें आखेआ जे चर्चा उर्जा ते अनियमिन पर केंद्रित होग।

<><><><><><>

Canada Firing

कनाडा दे टम्बलर रिज च इक स्कूलै च होई दी गोलीबारी च घट्टोघट्ट 10 लोकें दे मारे जाने दी खबर ऐ। इस घटना च केई लोक घायल बी होए न। पुलसै मुजब इक हमलावर चानचक्क स्कूलै च आई बडेआ ते अन्नेवाह गोलियां चलाना शुरू करी दित्तियां। उन्नै मगरा अपने आपै गी बी गोली मारी दित्ती। कनाडा दे प्रधानमंत्री मार्ककान्नी होंरें घटना पर गैहरा दुख प्रगट कीता ऐ। 6 जनें दियां लोथां स्कूलै अंदरा बरामद कीतियां गेइयां ते बाकिणं दी मौत अस्पताल लेंदे लेंदे या ईलाज दरान होई। दुनिया दे केई मुखें इस घटना पर गैहरा दुख प्रगट कीता ऐ।

<><><><><><>

PM-Canada

प्रधानमंत्री नरेंद्र मोदी होंरें कनाडा च होई दी जबरदस्त गोलीबारी आहली घटना पर गैहरा दुख प्रगट कीता ऐ। इक सोशल मीडिया पोस्ट च मोदी होंरें अपने परिवार दे जीएं गी मोआने आहलें कन्नै दुख ते हमदर्दी प्रगट कीती ते घायलें दे तौले नरोए होने दी प्रार्थना कीती। मोदी होंरें आखेआ कि दुखे दी इस घडी च समूलचा भारत कनाडा कन्नै इकजुटता कन्नै खडोते दा ऐ।

<><><><><><>

Russia-Ukraine Attack

यूक्रेन खारकीव दे उत्तर पूर्वी इलाके च जंदी रातीं इक मकानै पर रूस दे ड्रोन हमले च 34एं बरें दे इक आदमी ते ओह्दे 3 न्याणें दी मौत होई गेई। अधिकारिक जानकारी मुजब बोहोदुखीव च होए दे इस हमले च अगग लगगने कारण एहू मकान ढेई पेआ ते पूरा टब्बर एह्दे मलबे हेठ दबोई गेआ। यूक्रेन दी व्हाई फौज मुजब रूस दी तरफा रात भर 129 ड्रोन हमले कीते गए। इसै दरान रूस यूक्रेन लडाई दे 4 बरें पूरे होने दे मौके पर यूक्रेन गी होर मती फौजी सहायता देने पर चर्चा करने लेई यूरोपी संघ दे रक्षामंत्री ब्रसेल्स च बैठक करने जा'रदे ना। एहू समूह 2026-27 बरें दी अवधि दरान यूक्रेन गी 71 अरब 40 करोड़ डालर दा कर्जा देने पर बिचार करा'रदा ऐ।

<><><><><><>

ICC-Mens T-20

मर्दे दे आई.सी.सी टी-20 क्रिकेट विश्व कप च साउथ अफ्रीका नै अज्ज दपैहरी अहमदाबाद दे नरेंद्र मोदी स्टेडियम च अफगानिस्तान गी डबल सुपर ओवर च हराई दित्ता। ग्रुप-डी दे इक रोमांचक मुकाबले च दक्खन अफ्रीका ते अफगानिस्तान बश्कार जबरदस्त मुकाबलेबाजी दिक्खने गी थ्होई जेदे च मैच डबल सुपर ओवर तगर पुज्जी गेआ। पैहले बल्लेबाजी करदे होई दक्खन अफ्रीका ने 20 ओवरें च 6 विकेटें पर 187 रन बनाए हे। 188 रनें दे लक्ष्ये दा पिच्छा करदे होई अफगानिस्तान दी टीम 19 ओवर 4 गेंदें पर आल आउट होई गेई जेदे करी इक जबरदस्त सुपर ओवर होआ। एह्दे च अफगानिस्तान दी टीम ने 17 रन बनाए। एह्दे परते च दक्खन अफ्रीका दी टीम नै अखीरी गेंद पर छक्का लाइयै सुपर ओवर गी बराबरी पर खत्म कीता। दुए सुपर ओवर च दक्खन अफ्रीका नै 23 रन बनाए पर एह्दे परते च अफगानिस्तान दी टीम एह्दे थमां पार पाने च नाकाम रेई।

<><><><><><>

Hockey

हॉकी च भारत अज्ज राउरकेला दे बिरसा मुंडर अंतरराष्ट्री हॉकी स्टेडियम च फिच प्रो लीग कैपेन च बैल्लिजयम खलाफ मैदान च उतरोग। एहू मैच संझा साडे 7 बजे शुरू होग।

<><><><><><>